



Los ntawm Thawj Tswj Hwm  
Thomas S. Monson

# Tej Koob Hmoov ntawm lub Tuam Tsev

*Thaum peb nyob hauv lub tuam tsev, peb sab ntsuj plig  
yuav hloov hlo thiab yuav hnov kev kaj siab lug.*

**K**uv cov kwv tij cov muam, kuv zoo siab vim kuv tuaj nrog nej koom ua ke tag kis sawv ntxov Hnub Easter no thaum peb tej kev xav tig mus rau tus Cawm Seej rau lub ntiaj teb. Kuv xa kuv txoj kev hlub thiab kev zoo siab rau nej txhua tus thiab thov kom peb Leej Txiv Saum Ntuj Ceeb Tsheej yuav txhawb nqa kuv cov lus.

Hauv lub rooj sab laj no kuv nco txog xyaw xyoos tas los lawm thaum kuv raug tsa los ua tus Thawj Tswj Hwm rau lub Koom Txoos. Tej xyoo no yeej muaj hauj lwm ntau kawg, yeej muaj tej kev cov nyom tiam sis muaj tej koob hmoov uas suav tsis txheeb li. Tej koob hmoov zoo thiab dawb ceev tshaj plaws yog qhov uas kuv muaj cib fim mus fij thiab rov qab fij tej tuam tsev tseg rau Vajtswv.

Zaum tas los lawm, thaum lub Kaum Ib Hlis Ntuj tas los no kuv muaj cib fim muab lub Tuam Tsev hauv Phoenix Arizona fij tseg. Thawj Tswj Hwm Dieter F. Uchtdorf, Txwj Laug Dallin H. Oaks, Txwj Laug Richard J.

Maynes, Txwj Laug Lynn G. Robbins, thiab Txwj Laug Kent F. Richards tau koom nrog kuv. Hmo ua ntej muab fij tseg, tau muaj ib qho ua koob tsheej nco txog lawv kab lig kev cai uas muaj coob tshaj 4,000 tug tub thiab ntshais hluas hauv koog chaw rau lub tuam tsev uas tau ua yeeb yam rau peb saib. Ces hnub tom qab ntawd tau ua peb tuas dawb ceev thiab zoo kawg thaum muab lub tuam tsev fij tseg.

Txoj kev ua cov tuam tsev qhia tseeb hais tias lub Koom Txoos yeej loj hlob tuaj. Tam sim no peb muaj 144 lub tuam tsev thoob plaws ntiaj teb no, es tab tom rov qab kho 5 lub thiab tseem ua 13 lub ntxiv. Tsis tas li ntawd xwb, twb tshaj tawm txog 13 lub ntxiv uas tseem tab tom ntaus tswv yim seb yuav pib ua cov tuam tsev. Xyoo no peb npaj siab yuav rov qab muab 2 lub tuam tsev fij tseg thiab muab 5 lub tuam tsev tshiab fij tseg uas yuav ua tiav xyoo no.

Rau ob xyoos tas los lawm, thaum peb sib zog ua cov tuam tsev uas peb

twb tshaj tawm txog kom tiav tas, peb tsis tau ntaus tswv yim txog ib co tuam tsev ntxiv. Tiam sis, tag kis no, kuv zoo siab tshaj tawm txog peb lub tuam tsev tshiab uas peb yuav ua hauv tej qhov chaw no: Abidjan, Ivory Coast teb; Port-au-Prince, Haiti teb; thiab Bangkok, Thaib teb. Peb cov mej zeej uas rau siab ntseeg hauv tej chaw no yuav tau koob hmoov loj kawg nkaus, muaj tseeb tiag, txawm cov tuam tsev nyob qhov twg hauv ntiaj teb no los lawv tau koob hmoov.

Tseem ua txoj kev txiav txim txog thiab nrhiav tej chaw rau cov tuam tsev ntxiv, vim peb xav kom cov mej zeej coob npaum li coob tau yuav muaj cib fim mus rau lub tuam tsev tsis tas yuav txi sij hawm thiab nyiaj ntau ntau. Ib yam li peb tau ua yav tas los lawm, peb yuav qhia nej seb peb txiav txim li cas hais txog tej no.

Thaum kuv xav txog cov tuam tsev, kuv xav txog ntau txoj koob hmoov uas peb txais hauv. Thaum peb nkag kias hauv lub qhov rooj rau lub tuam tsev, peb tseg txhua yam kev kub ntshov thiab tej yam uas tab kaum peb hauv ntiaj teb no. Nyob hauv qhov chaw dawb ceev no, peb nrhiav tau kev zoo nkauj thiab txoj kev muaj kab muaj kev. Peb tus ntsuj plig tau chaw so thiab peb dim tej kev nyuaj siab hauv peb lub neej.

Thaum peb nyob hauv lub tuam tsev, peb sab ntsuj plig yuav hloov hlo thiab yuav hnov kev kaj siab lug ntau tshaj lwm yam uas peb lub siab tau hnov dua. Peb yuav pib to taub tias tus Cawm Seej hais li cas tiag thaum Nws hais tias: “Kuv muab kuv txoj kev kaj siab tso rau nej; txoj kev kaj siab uas kuv muab pub rau nej. . . . Nej

tsis txhob txhawj, tsis txhob nyuaj siab thiab tsis txhob ntshai.”<sup>1</sup>

Txoj kev kaj siab no nkag tau mus rau hauv ib lub siab twg los tau—tej siab uas xeeb txhob, tej siab uas muaj kev nyuaj siab ntau, tej siab uas raug kev kub ntxhov, tej siab uas xav tau kev pab.

Tsis ntev tas los lawm kuv hnov txog ib tug tub hluas uas mus rau hauv lub tuam tsev vim nws taij thov kom tau kev pab. Ntau hli ua ntej ntawd nws raug hu mus ua tub txib nram Amelikas Sab Qab Teb. Tiam sis, nws daim visa uas pub nws nkag mus txawv teb chaws pheej tsis tuaj txog ces nws raug xa mus ua tub txib hauv Teb Chaws Amelikas. Txawm nws poob siab me ntsis vim nws mus tsis tau rau qhov chaw uas nws xub raug hu mus ua tub txib ntawd, nws tseem sib zog ua hauj lwm hauv qhov chaw tshiab no, nws txiav txim siab tias nws yuav ua zoo npaum li nws ua tau. Tiam sis nws pib poob siab, vim nws pom tej yam tsis zoo nrog ib co tub txib uas zoo nkaus li xav muaj kev lom zem tsis tshua xav tshaj tawm txoj moo zoo.

Ob peb hlis tom qab ntawd tus tub hluas no muaj mob loj uas ua rau nws tuag tes tuag taw, ces tau xa nws mus tsev kom tau kev kho mob.

Ces ob peb hlis tom qab ntawd tus tub hluas no txawm zoo mob zoo nkees, nws txoj kev tuag tes tuag taw tau ploj mus. Lawv qhia nws tias nws yuav muaj cuab kav rov qab mus ua tub txib dua, txhua txhua hnuv nws twb thov Vajtswv foom koob hmoov li ntawd rau nws. Tib qho uas ua rau nws poob siab yog qhov uas nws yuav tau rov qab mus rau qhov chaw ua tub txib uas nws nyob thaum nws los tsev, vim nws xav tias nyob ntawd ib txhia tub txib ua tsis tshua zoo thiab lawv tsis koj cwj pwm zoo tag nrho.

Nws tau los rau hauv lub tuam tsev nrhiav kev nplij siab thiab lus pom zoo hais tias nws yuav ua tej yam zoo thaum nws mus ua tub txib dua. Nws niam thiab txiv tau thov Vajtswv kom qhov uas nws mus hauv lub tuam tsev yuav pab nkawd tus tub thiab.

Thaum ua tuas tas es tus tub hluas mus hauv chav xilethi-aus, nws zaum ntawm ib lub rooj zaum thiab pib thov kom nws Leej Txiv Saum Ntuj Ceeb Tsheej yuav koj nws kev.

Tsis ntev tom qab ntawd muaj dua lwm tus txiv neej hluas npe hu ua Landon uas nkag los hauv chav xilethi-aus thiab. Thaum nws los hauv chav tsev ntawd, nws cia li ntsia ntsoov tus tub hluas uas zaum ntawm lub rooj zaum, qis qhov muag tab tom thov Vajtswv. Landon tau kev tshoov siab kom mus nrog tus tub hluas ntawd tham. Tiam sis, nws tsis xav txiav tus ntawd txoj kev thov Vajtswv ces, nws thiaj tos me ntsis. Tom qab ob peb na this, tus tub hluas tseem thov Vajtswv. Landon txawm paub tias nws tos tsis tau ntxiv yuav ua raws li txoj kev tshoov siab no. Nws los rau ntawm tus tub hluas thiab maj mam kov nws sab xwb pwg. Tus tub hluas qhib qhov muag, ib nyuag ceeb vim leej twg kov nws. Landon ntxhi lus hais tias, “Kuv tau kev tshoov siab hais tias kuv yuav tau nrog koj tham, tab sis mas tsis paub yog vim li cas.”

Thaum nkawd pib sib tham, tus tub hluas nthuav tag nrho nws siab ntsws rau Landon, piav hais tias nws raug xwm dab tsi thiab piav hais tias nws tsuas xav tau kev nplij siab thiab kev txhawb nqa hais txog nws txoj kev mus ua tub txib. Landon, uas nyuam qhuav los tsev ib xyoos tom qab ua ib tug tub txib zoo, piav txog qhov uas nws mus ua tub txib, tej teeb meem thiab kev txhawj xeeb uas nws muaj thiab, qhov uas nws tau thov tus Tswv kev pab, thiab tej koob hmoov uas nws tau txais. Nws cov lus pab nplij thiab txhawb nqa nws siab, nws ua rau tus tub hluas xav mus ua tub txib. Nyob nyob ces, nws tej kev ntshai pib ploj mus, ces tus tub hluas tau muaj kev kaj siab lug. Nws muaj kev ris txiaj heev vim nws paub tias Vajtswv tau teb nws zaj lus thov.

Ob tug txiv neej hluas no thov Vajtswv ua ke, ces Landon npaj yuav mus tsev, zoo siab heev vim nws tau ua raws li txoj kev tshoov siab uas

nws raug ntawd. Thaum nws sawv yuav mus, tus tub hluas nug Landon hais tias, “Koj tau ua tub txib rau qhov twg?” Txog lub sijhawm no nkawd ob leeg tib si tsis tau hais tias nkawd tau mus ua tub txib rau qhov chaw twg. Thaum Landon teb hais tias nws tau mus rau qhov chaw twg, tus tub hluas no tau pib los kua muag. Landon tau ua tub txib hauv tib qho chaw uas tus tub hluas no yuav rov qab mus nyob!

Hauv ib tsab ntawv uas Landon sau rau kuv, nws qhia tias tus tub hluas hais li no rau nws tias: “Kuv twb ntseeg hais tias Leej Txiv Saum Ntuj Ceeb Tsheej yuav foom koob hmoov rau kuv, tiam sis kuv yeej tsis tau xav tias nws yuav xa ib tug los pab kuv uas tau ua tub txib hauv kuv qhov chaw ua tub txib ntag. Kuv paub tias txhua yam yeej yuav zoo.”<sup>2</sup> Twb tau hnov thiab teb txoj kev txo hwj chim thov Vajtswv ntawd.

Kuv cov kwv tij thiab cov muam, peb yuav raug tej kev ntxias hauv peb lub neej; peb yuav raug tej kev sim siab thiab tej teeb meem. Thaum peb mus hauv lub tuam tsev, thaum peb nco txog tej kev khi lus uas peb khi tseg hauv, peb yuav haj yam muaj cuab kav kov yeej tej kev ntxias ntawd thiab nyiaj mus dhau peb tej kev sim siab. Nyob hauv lub tuam tsev peb nrhiav tau kev kaj siab lug.

Tej koob hmoov hauv lub tuam tsev muaj nuj nqi uas suav tsis txheeb. Txhua hnuv kuv muaj kev ris txiaj heev rau qhov kuv tus me poj niam, Frances, wb tau txhos caug ntawm lub thaj thiab tau ua tej kev sib khi lus uas muab wb sib khi ua ke tas mus ib txhis. Tsis muaj ib txoj koob hmoov uas muaj nqi tshaj qhov no vim kuv tau kev kaj siab lug thiab kev nplij siab vim kuv paub hais tias wb yeej yuav nyob ua ke dua.

Thov kom peb Leej Txiv Saum Ntuj Ceeb Tsheej yuav foom koob hmoov rau peb kom peb muaj lub siab xav teev tiam hauv lub tuam tsev, thov kom peb yuav ua raws li Nws cov lus txib, thiab kom peb yuav ua tib zoo raws peb tus Tswv thiab tus Cawm

Seej, Yexus Khetos qab. Kuv ua tim khawv tias Nws yog peb tus Txhiv Dim. Nws yog Vajtswv Leej Tub. Nws tau tawm ntawm lub ntxa los thawj hnuv Easter, Nws koj qhov khoom plig uas yog txoj sia nyob mus ib txhis los rau Vajtswv txhua tus me nyuam. Hauv hnuv zoo nkauj kawg no, thaum peb ua koob tsheej nco txog qhov no, thov kom peb yuav muaj kev ris txiaj rau Nws qhov khoom plig zoo kawg nkaus uas Nws pub rau peb. Thov kom yuav muaj li no, kuv txo hwj chim thov li no los ntawm Nws lub npe dawb huv, amees.

**LUS CIM**

1. Yauhas 14:27.
2. Tej lus yog los ntawm Thomas S. Monson.

## Kev Qhia rau Peb lub Caij Nyoog

Txij thaum lub Tsib Hlis Ntuj xyoo 2015 mus txog lub Kaum Hli Ntuj xyoo 2015, yuav tsum npaj ib zaj los yog ob peb zaj lus hais los ntawm lub Plaub Hlis Ntuj xyoo 2015 lub tuam rooj sab laj kom qhia hauv pawg Pov Thawj Hwj Mekixedes thiab Koom Haum Niam Tsev tej kev sib ntsib thaum hnuv Sunday. Thaum Kaum Hli Ntuj, xaiv tau tej zaj los ntawm lub Plaub Hlis Ntuj xyoo 2015 los sis Kaum Hli Ntuj xyoo 2015 lub tuam rooj sab laj. Ceg txheem ntseeg thiab koog chaw cov thawj tswj hwm yuav tau xaiv tej zaj lus hais uas yuav siv nyob hauv lawv tej cheeb tsam, los yog lawv muab lub luag hauj lwm no tso rau cov npisov los yog ceg ntseeg cov thawj tswj hwm xaiv los tau thiab.

Cov lus hais no muaj txawm peem ua ntau yam lus nyob rau ntawm [conference.lds.org](http://conference.lds.org).



**Los ntawm Thawj Tswj Hwm Dieter F. Uchtdorf**

Tus Pab Cuam thib Ob hauv Thawj Pawg Thawj Tswj Hwm

# Lub Txiaj Ntsim Tshav Ntuj

*Hnub no thiab nyob mus ib txhis cov uas muaj lub siab mob  
thiab lub siab uas xav ua zoo txais tau Vajtswv txoj kev tshav ntuj.*

**T**haum Hnub Easter peb ua koob tsheej txog qhov uas tib neeg tau tos ntsoov thiab yog ib qho zoo tshaj txhua yam txij thaum ntuj tsim teb raug los.

Yog ib hnub uas hloov ib puas tsav yam.

Thaum hnub ntawd, kuv lub neej tau hloov lawm.

Nej lub neej tau hloov lawm.

Tag nrho Vajtswv cov me nyuam txoj hmoov hloov lawm.

Nyob rau hnub ntawd, tib neeg tus Cawm Seej, tus uas tau ris txoj saw hlau ntawm kev txhaum thiab kev tuag uas khi peb, nws muab txoj saw hlau ntawd tu nrho thiab tso peb dim.

Vim peb tus Txhiv Dim ua kev txi no, kev tuag tsis muaj taug, lub ntxa yuav kov tsis yeej.<sup>1</sup> Dab Ntxwg Nyooog tsis muaj hwj chim uas kav ntev, thiab Leej Txiv “tsa Yexus Khetos *sawv rov los* pab peb kom peb muaj txoj sia tshiab.”<sup>2</sup>

Muaj tseeb tiag, tus Thwv Tim Povlauj hais qhov yog thaum nws hais kom peb “cia li muab tej lus no nplij txhua tus lub siab.”<sup>3</sup>

## Vajtswv txoj Kev Tshav Ntuj

Peb hais ntau txog tus Cawm Seej txoj Kev Theej Txhoj—thiab yeej tsim nyog ua li no!

Raws li Yakhauj hais tias, “Yog vim li cas thiaj yuav tsis qhia txog Khetos txoj kev theej txhoj, thiab txais yuav txoj kev paub meej tag nrho [txog] nws?”<sup>4</sup> Tiam sis thaum peb “hais txog Khetos, . . . zoo siab txog Khetos, . . . qhia txog Khetos, [thiab] qhia tej yuav muaj los yav tom ntej txog Khetos”<sup>5</sup> txhua lub sij hawm, peb yuav tsum ris Vajtswv txiaj rau Vajtswv Leej Tub txoj kev txi uas kav ib txhis.

Peb yuav tsum tsis txhob lam qhia thiab lam sib tham txog tus Cawm Seej txoj Kev Theej Txhoj. Yog ib qho dawb huv, vim dhau los ntawm “txoj kev txi loj thiab kawg” ntawm Yexus Khetos thiaj muaj “txoj kev cawm seej los rau txhua tus uas yuav ntseeg nws lub npe.”<sup>6</sup>

Kuv xav tsis thoob tias Vajtswv Leej Tub yuav nqis los cawm peb, vim peb yog neeg tsis dawb huv, tsis zoo tag nrho, uas ua yuam kev thiab tsis ris txiaj. Kuv tsis muaj peev xwm to

taub tus Cawm Seej txoj Kev Theej Txhoj tag nrho, thiab thaum kawg kuv tsuas piav tau li no xwb hais tias: Vajtswv hlub peb kawg nkaus mus ib txhis li. Kuv tsis txawj xav txog “qhov dav, qhov ntev, qhov tob, thiab qhov siab . . . [ntawm]Yexus Khetos txoj kev hlub.”<sup>7</sup>

Ib qho uas qhia meej txog txoj kev hlub no yog qhov uas cov vaj lug kub hu ua *Vajtswv txoj kev tshav ntuj*—uas yog Vajtswv txoj kev pab thiab kev pub dag zog uas pab peb loj hlob tuaj ntawm cov neeg uas ua yuam kev rais los ua cov neeg ntawm qhov tseeb thiab qhov kaj, mus txog thaum peb txais yeeb koob los ntawm qhov tseeb thiab peb paub txhua yam.<sup>8</sup>

Vajtswv txoj kev tshav ntuj yog ib qho zoo kawg nkaus. Tiam sis neeg feem coob tsis to taub qhov no.<sup>9</sup> Txawm li ntawd los, peb yuav tsum paub txog Vajtswv txoj kev tshav ntuj yog tias peb xav txais tej yam uas Nws tau npaj rau peb nyob hauv Nws lub nceeg vaj nyob mus ib txhis.

Yog li ntawd kuv xav hais lus txog kev tshav ntuj. Kuv xav hais txog, qhov thib ib, qhov uas kev tshav ntuj *qhib lub rooj ntug*, thiab qhov thib ob, ua rau peb *txais tau cov koob hmoov saum ntuj ceeb tsheej*.

## Qhov Ib: Kev Tshav Ntuj

### Qhib lub Rooj Ntuj

Rau qhov peb “txhua tus puav leej ua txhaum thiab tu ncuva Vajtswv lub hwj chim lawm,”<sup>10</sup> thiab vim “muaj tsis tau ib yam dab tsi uas vuab tsuab nkag tau mus rau hauv Vajtswv lub nceeg vaj ib zaug li,”<sup>11</sup> peb txhua tus tsis tsim nyog rov qab mus nrog Vajtswv nyob.

Txawm peb yuav ua hauj lwm rau Vajtswv kawg siab kawg ntsws los,

yeej tsis txaus nkaus, vim peb tseem yog “cov tub qhe tsis muaj nqis”.<sup>12</sup> Peb them tsis tau nqi kom nkag mus rau hauv ntuj ceeb tsheej; kev txim lij tav peb kev, es peb kov tsis yeej qhov no peb tus kheej xwb.

Tiam sis yeej muaj ib txoj kev.

Vajtswv txoj kev tshav ntuj yog peb txoj kev cia siab uas tseem ceeb thiab kav ib txhis.

Dhau los ntawm Yexus Khetos txoj kev txi, txoj kev hlub tshua them tau tej nqi ntawm txoj kev txim lij<sup>13</sup> “thiab ua kom muaj kev rau noob neej kom lawv yuav muaj kev ntseeg los hloov siab lees txim.”<sup>14</sup>

Peb tej kev txhaum, txawm yuav liab cuag ntshav los yuav ua kom dawb paug li daus.<sup>15</sup> Vim peb tus Cawm Seej “muab nws txoj sia los theej sawv daws lub txhoj,”<sup>16</sup> ces Nws qhib kev rau peb nkag mus rau hauv Nws lub nceeg vaj.<sup>17</sup>

Lub rooj ntug qhib lawm!

Tiam sis Vajtswv txoj kev tshav ntuj tsis ua rau peb rov qab rais los ua neeg uas tsis muaj txim. Yog tias kev cawm seej tshem peb tej kev ua yuam kev thiab tej kev txhaum xwb, ces txoj kev cawm seej tsis pab peb ua raws li Leej Txiv lub siab nyiam rau peb. Nws xav kom peb ua ntau ntxiv: Nws xav kom Nws cov tub thiab ntxhais rais los ua neeg zoo li Nws.

Thaum peb muaj Vajtswv lub txiaj ntsim tshav ntuj, ces kev ntseeg tsis ua rau peb mus rov qab; ua rau peb yuav mus tom ntej xwb.

Kev tshav ntuj yuav ua rau peb mus siab tshaj qhov peb to taub! Yuav ua rau peb txais tau kev tsa nto nyob hauv peb Leej Txiv Saum Ntuj Ceeb Tsheej lub nceeg vaj xilethi-aus, qhov chaw uas peb yuav nrog cov uas peb hlub txais tau tag nrho nws muaj thiab tag nrho nws lub yeeb koob.<sup>18</sup> Txhua yam yog peb li, thiab peb yog Khetos li.<sup>19</sup> Muaj tseeb tiag, txhua yam uas Leej Txiv muaj los yuav muab rau peb.<sup>20</sup>

Yog peb xav txais lub yeeb koob no, ib lub qhov rooj uas qhib lawm yeej tsis txaus; peb yuav tsum nkag mus rau hauv ntuj ceeb tsheej nrog

ib lub siab uas xav hloov—ib lub siab uas xav hloov ib yam li vaj lug kub piav txog hais tias peb “yug dua tshiab; muaj tseeb tiag yug los ntawm Vajtswv, pauv ntawm [peb] tej kev ntiaj teb thiab ntawm txoj kev poob, los rau . . . kev ncaj ncees, raug Vajtswv txhiv dim, ciaj los mus ua nws tej tub thiab tej ntxhais.”<sup>21</sup>

#### **Qhov Ob: Kev Tshav Ntuj Ua rau Peb Txais Tau cov Koob Hmoov Saum Ntuj Ceeb Tsheej**

Ib qho ntxiv uas los ntawm Vajtswv txoj kev tshav ntuj yog qhov uas peb txais tau cov koob hmoov saum ntuj ceeb tsheej xws li lub hwj chim thiab kev dag zog, ua rau peb ua tau tej yam uas peb ua tsis tau yog peb tsis muaj Nws txoj kev tshav ntuj. Yog los ntawm Vajtswv txoj kev tshav ntuj Nws cov me nyuam thiaj paub kov yeej tus yeeb ncuab, kov yeej kev txhaum, thiab los ua neeg zoo tag nrho dhau los ntawm Khetos.<sup>22</sup>

Txawm peb txhua tus muaj tej kev qaug zog, peb kov yeej tau tej ntawd. Muaj tseeb tiag dhau los ntawm Vajtswv txoj kev tshav ntuj, yog peb tso hwj chim thiab muaj kev ntseeg, tej yam qaug zog yuav hloov los ua tej yam uas muaj zog.<sup>23</sup>

Nyob hauv peb lub neej, Vajtswv txoj kev tshav ntuj pub cov koob hmoov ntawm lub ntiaj teb no thiab tej txiaj ntsim ntawm sab ntsuj plig uas pab peb lub neej thiab txhawb nqa peb tej txuj ci. Nws txoj kev tshav ntuj hloov peb lub siab kom peb xav ua zoo. Nws txoj kev tshav ntuj pab peb ua neeg zoo.

#### **Leej Twg Tsim Nyog Txais Tau?**

Nyob hauv phau Npaiv Npaum peb nyeem txog lub sij hawm uas Yexus Khetos mus xyuas Ximoos uas yog ib tug Falixais.

Rau luag pom mas, Ximoos yog ib tug neeg zoo thiab ncaj. Nws pheej ua tej yam nws yuav tsum ua kom teev ntuj: nws ua raws li kev cai, them ib feem kaum, hwm Hnub Caiv, thov Vajtswv txhua hnub, thiab mus rau lub tsev teev ntuj.

Tiam sis thaum Yexus nrog

Ximoos, ib tug poj niam tuaj, ntxuav tus Cawm Seej txhais ko taw nrog nws cov kua muag, thiab pleev roj zoo rau Nws txhais ko taw.

Ximoos tsis zoo siab txog qhov no, vim nws paub tias tus poj niam yog ib tug neeg txhaum. Ximoos xav hais tias yog Yexus tsis tau paub, ces Nws tsis yog ib tug yaj saub vim Nws yuav tsis pub tus poj niam kov Nws.

Yexus paub Ximoos tej kev xav thiab nug Ximoos ib lo lus nug. “Muaj ob tug txiv neej tshuav ib tug yawg nqi. Ib tug tshuav tsib puas lub nyiaj, ib tug tshuav tsib caug lub nyiaj.

Nkawd puav leej tsis muaj nyiaj them tus yawg ntawd, ces tus yawg ntawd txawm zam nqi rau nkawd huv tib si. Yog li, ob tug ntawd, tus twg yuav nco tus yawg ntawd txiaj ntsig heev dua?”

Ximoos teb hais tias yog tus uas tus yawg ntawd zam nqi ntau rau.

Ces Yexus qhia ib zaj tseem ceeb:

“Koj puas pom tus poj niam no?

. . . Qhov uas tus poj niam no muaj kev hlub loj npaum li no, *qhia hais tias Vajtswv tub zam nws tej kev txhaum huv tib si lawm*. Tiam sis tus uas Vajtswv zam txim tsawg, tus ntawd yeej nco Vajtswv txiaj ntsig tsawg.”<sup>24</sup>

Peb zoo li tus twg ntawm ob tug neeg no?

Peb puas zoo li Ximoos? Peb puas xav tias peb ua tej yam zoo, tso siab rau peb txoj kev ua ncaj ncees? Peb puas ua siab luv rau cov uas tsis ua raws li peb tej kev cai? Peb puas lam koom peb tej kev sib ntsib, rua lo nyob hauv hoob kawm txoj Moo Zoo cov Lus Qhuab Qhia, thiab saib peb xov tooj ntawm tes nyob hauv kev sib ntsib txais lub cim nco txog?

Los yog peb puas zoo li tus poj niam, tus uas xav tias nws tsis muaj kev cia siab thiab poob siab tag nrho vim yog nws tej kev txhaum?

Peb puas *hlub ntau*?

Peb puas to taub hais tias peb ris Leej Txiv Saum Ntuj Ceeb Tsheej txiaj thiab thov kawg siab kawg ntsws kom txais tau Vajtswv txoj kev tshav ntuj?

Thaum peb txhos caug thov Vajtswv, peb puas hais txog peb

txoj kev ua ncaj ncees, los yog peb puas lees hais tias peb ua txhaum, thov kom txais Vajtswv txoj kev hlub tshua, thiab los kua muag vim peb ua Vajtswv tsaug rau txoj kev txhiv dim?<sup>25</sup>

Peb txoj kev mloog lus them tsis tau tus nqi ntawm txoj kev cawm seej; Vajtswv Leej Tub twb los ntshav kom them tus nqi ntawd.<sup>26</sup> Qhov uas peb xav tias peb tej hauj lwm zoo them tau tus nqi ntawm kev cawm seej yeej zoo li yus yuav pib nyab hoom ces xav tias yus twb yuav tag nrho lub koom haum tsav nyab hoom. Los yog xav tias tom qab yus them nqi rau yus lub tsev, yus twb yuav tag nrho lub ntiaj teb.

### Vim Li Cas Yuav Tsum Mloog Lus?

Yog tias kev tshav ntuj yog Vajtswv lub txiaj ntsim uas Nws pub rau peb, ces vim li cas peb yuav tsum ua raws li Vajtswv tej lus txib? Vim li cas peb yuav tsum koj raws li Vajtswv hais—los yog hloov siab lees txim? Vim li cas peb yuav tsis hais tias peb twb ua txhaum thiab cia Vajtswv cawm peb xwb?

Los sis, raws li Povlauj nug hais tias, “Puas tsim nyog peb pheed ua txhaum kom Vajtswv haj yam hlub peb ntxiv?” Povlauj teb meej meej hais tias: “Tsis txhob ua li ntawd.”<sup>27</sup>

Cov kwv tij thiab cov muam, peb ua raws li Vajtswv tej lus txib—vim peb hlub Nws!

Thaum peb siv zog to taub Vajtswv txoj kev tshav ntuj kawg siab kawg ntsws ua rau peb paub vim li cas peb yuav tsum txo hwj chim thiab muaj kev ris txiaj mloog peb Leej Txiv Saum Ntuj Ceeb Tsheej lus. Thaum peb taug kev zoo li Nws cov thwj tim, ces Nws txoj kev tshav ntuj pab peb, hloov peb lub siab, thiab pab peb rais los ua neeg zoo li Nws, thiab koj peb rov qab mus nrog Nws nyob. “Tus Tswv uas Muaj Hwj Chim Loj Tshaj Plaws tus Ntsuj Plig, uas tau ua ib qhov kev pauv loj nyob hauv peb, . . . xwv kom peb tsis muaj siab xav ua phem ntxiv lawm, tiam sis ua zoo kom tsis tu ncuu mus li.”<sup>28</sup>

Yog li ntawd, peb ua raws li Vajtswv tej lus txib vim peb hlub thiab ris Vajtswv txiaj. Txoj kev hlub thiab kev ris txiaj tiag tiag zoo li no yuav ua rau peb tej hauj lwm koom ua ke nrog Vajtswv txoj kev tshav ntuj. Peb yuav xav txog kev koj dawb huv tsis tu ncuu, thiab peb txoj kev tso siab yuav muaj zog nyob ntawm Vajtswv lub xub ntiag.<sup>29</sup>

Cov kwv tij thiab cov muam, kev rau siab ua neej raws li txoj moo zoo yeej tsis yog ib lub nra hnyav. Yog txoj kev xyiv fab—kev npaj txais tau lub yeeb koob uas nyob mus ib txhis ua peb tug. Peb xav mloog peb Leej Txiv Saum Ntuj Ceeb Tsheej lus vim yog peb ua li ntawd ces yuav pab peb txawj mloog tej yam ntawm sab ntsuj plig. Yuav qhib tej txoj kev uas peb tsis tau paub txog. Peb yuav to taub meej heev thaum peb ua raws li Leej Txiv lub siab nyiam.<sup>30</sup>

Txoj kev tshav ntuj yog ib lub txiaj ntsim ntawm Vajtswv, thiab thaum peb xav ua raws li Vajtswv tej lus txib ces peb ncau tes txais tau lub txiaj ntsim dawb huv los ntawm peb Leej Txiv Saum Ntuj Ceeb Tsheej.

### Txhua Yam Peb Ua Tau

Tus yaj saub Nifais tau pab peb to taub Vajtswv txoj kev tshav ntuj thaum nws hais tias, “Peb rau siab ntso ua zoo . . . los yaum peb tej me nyuam, thiab peb cov kwv tij thiab, kom los ntseeg . . . Khetos, thiab rov los nrog Vajtswv sib raug zoo; vim peb paub hais tias twb yog *los ntawm txoj kev zoo uas peb raug cawm dim, tom qab uas peb tau ua txhua txhia yam uas peb ua tau.*”<sup>31</sup>

Tiam sis, tej lub sij hawm kuv xav tias peb tsis to taub lo lus “tom qab uas peb tau ua txhua txhia yam uas peb ua tau.” Peb yuav tsum to taub hais tias “tom qab” tsis txhais hais tias “rau qhov.”

Peb tsis dim “rau qhov” peb tau ua txhua yam peb ua tau. Puas muaj leej twg uas tau ua *txhua yam* peb ua tau? Vajtswv puas tos mus txog thaum

peb siv dag zog tag nrho ua ntej Nws yuav cawm peb los ntawm Nws txoj kev tshav ntuj?

Ntau tus neeg poob siab thaum lawv pheed ua yuam kev. Lawv paub ntawm lawv tus kheej tias “lub siab mas kub lug, tiam sis cev nqaij daim tawv qaug zog kawg li.”<sup>32</sup> Lawv tsa suab nrog Nifais tshaj tawm tias “kuv tus ntsuj plig muaj kev nyuaj siab yeej vim kuv tej kev tsis ncaj ncees.”<sup>33</sup>

Kuv paub tseeb tias Nifais tau paub tias tus Cawm Seej txoj kev tshav ntuj *cia* thiab *pab* peb kov yeej kev txhaum.<sup>34</sup> Yog vim li no Nifais thiaj rau siab ntso yaum nws cov me nyuam thiab cov kwv tij “kom los ntseeg Khetos, thiab rov los nrog Vajtswv sib raug zoo.”<sup>35</sup>

Thaum kawg, *li ntawd* yog tej yam uas peb ua tau! Thiab peb txoj hauj lwm hauv lub neej no *yeej yog li ntawd!*

### Txhua tus Txais Tau Kev Tshav Ntuj

Thaum kuv xav txog txhua yam uas tus Cawm Seej ua rau peb ua ntej thawj Hnub Caiv Easter, kuv xav tsa suab qhuas Vajtswv tus uas Siab Tshaj Plaws thiab Nws Leej Tub, Yexus Khetos!

Nws twb qhib rooj ntug lawm!

Nws qhib kev rau peb txais koob hmoov lawm!

Hnub no thiab nyob mus ib txhis cov uas muaj lub siab mob thiab lub siab uas xav ua zoo txais tau Vajtswv txoj kev tshav ntuj.<sup>36</sup> Yexus Khetos tau npaj txoj kev rau peb nce siab tshaj qhov peb muaj peev xwm xav txog.<sup>37</sup>

Kuv thov kom peb yuav muaj qhov muag tshiab kom pom kev thiab muaj siab tshiab kom paub tias tus Cawm Seej txoj kev theej txhoj tseem ceeb npaum li cas. Kuv thov kom peb yuav qhia Vajtswv tias peb hlub nws thiab peb ris Nws txiaj rau Vajtswv txoj kev tshav ntuj thaum peb koj raws li Nws tej lus txib thiab muaj kev xyiv fab “ua lub neej tshiab.”<sup>38</sup> Los ntawm peb tus Xib Hwb thiab tus Txhiv Dim, Yexus Khetos lub npe, amees.

**LUS CIM**

1. Saib 1 Kauleethaus 15:55; Mauxiyas 16:8.
2. 1 Petus 1:3; ntxiv qhov uas ntawv qaij.
3. 1 Thexalaunikes 4:18; kuj saib nqes 13–17.
4. Yakhauj 4:12.
5. 2 Nifais 25:26.
6. Amas 34:10, 15.
7. Efexus 3:18–19.
8. Lus Qhuab Qhia thiab Kev Khi Lus 93:28.
9. Muaj tseeb tiag peb yog “me nyuam yaus, thiab peb tseem tsis tau to taub hais tias Leej Txiv muaj tej koob hmoov loj npaum li cas nyob hauv nws tus kheej txhais tes thiab tau npaj rau nej; (saib Lus Qhuab Qhia thiab Kev Khi Lus 78:17).
10. Loos 3:23.
11. 1 Nifais 15:34; kuj saib 1 Nifais 10:21;
12. Mauxiyas 2:21.
13. Saib Amas 42:15.
14. Amas 34:15.
15. Saib Yaxayas 1:18.
16. 1 Timautes 2:6.
17. Saib 2 Petus 1:11.
18. Lus Qhuab Qhia thiab Kev Khi Lus 76:56.
19. Saib Lus Qhuab Qhia thiab Kev Khi Lus 76:59.
20. Saib Lus Qhuab Qhia thiab Kev Khi Lus 84:38.
21. Mauxiyas 27:25.
22. Maulaunais 10:32.
23. Saib Ethaws 12:27.
24. Saib Lukas 7:36–50; ntxiv qhov uas ntawv qaij.
25. Yexus Khetos cov lus piv txwv txog tus Falixais thiab tus sau se piav txog qhov no meej heev (saib Lukas 18:9–14).
26. Saib Tes Hauj Lwm 20:28.
27. Loos 6:1–2.
28. Mauxiyas 5:2.
29. Saib Lus Qhuab Qhia thiab Kev Khi Lus 121:45.
30. Saib Yauhas 7:17.
31. 2 Nifais 25:23; ntxiv qhov uas ntawv qaij.
32. Mathais 26:41; kuj saib Loos 7:19.
33. 2 Nifais 4:17.
34. Saib 2 Nifais 4:19–35; Amas 34:31.
35. 2 Nifais 25:23.
36. Saib 3 Nifais 9:19–20.
37. Saib 1 Kauleethaus 2:9.
38. Loos 6:4.